

摘藻堂四庫全書薈要

集部

欽定四庫全書薈要

集部

端明集卷十二

詳校官助教臣常循



欽定四庫全書薈要卷一萬四千五百十

集部

端明集卷十

宋 蔡襄 撰

制誥

中書試金吾衛大將軍除邊鎮節度使制



天下之重惟將相之任必在於得人閭外之專有

文武之資乃可以屬事春茲藩屏控夫朔陲開府文書
董貔貅百萬之衆被邊亭障實耕桑什伍之人求其遠
御之良付以中權之劇厥有成命告于廟朝具官某沉

勇本於天資練達通於世務有明敏之智臨機而必決
有方厚之質自信而不疑久歷官聯關總環衛廉行徼巡
之道督刺大衆之居士旅勅馴寇攘哀止嘗以清閒之
宴與之從容而言亮其忠純授以節制於戲甲兵乃刑
之大軍旅以禮為先爾其察甘苦而周下情明法令而
一羣志又綏封略旌錄勲勞惠愛究於黎元威聲伸於
大漠副茲委用勿懈乃心可

中書試禮部尚書除御史大夫制

門下朝廷興治之原法制修明為大內有公卿臺寺之
衆外有牧守方伯之聯察繩其違第次厥課秦漢而下
專委中司祿秩之崇差貳上宰所付茲重惟才之求具
官某服先民之言承名家之學文章深厚以華於國行
實朴茂以充其中歷侍禁嚴益劬風問嚮居都座嘗典
春官傳經決事而甚明飭躬率下而自正是用獨持朝
憲彈肅官師夫聲利不誅之謂剛端勁不阿之謂直獻
議每形於鯁亮舉邪勿吐於權豪汝服斯猷往勵而屬

可

中書試郡國察孝悌力田詔

勅朕念古先聖人極遠慮而垂大法元元之民其生長
也有教育之地故能興行於家力作於埜親族和同愛
足以相恤衣食贍給力足以相保然後獄訟衰而盜賊
息以格於治平嗚呼其盛也哉自戰國歷秦重利而寡
恩孝悌之風薄矜奢而廣欲惰游之手衆驅人於不善
率由是已豈斯民之性有所偏異蓋導之之具至與不

至耳朕居士民之上父母之司內竭至誠奉祖宗而惇
族屬外務朴素却侈用而息煩費思與吾人尚本而棄
末然而生齒之聚或戾於教義而困於饑饉者其導之
未至歟今郡國長吏皆朕協力而宣化其有孝悌章明
勤於田畝可率鄉黨者其以名聞朕將錄之以風天下
戒勵臣僚奏薦勅

右正言直集賢院同脩起居注韓絳奏臣竊見臣僚
奏薦文武官頗或所舉無名所稱不實妄冀朝命以

為私恩伏恐請託公行重增爵賞之濫此弊不革為
蠹實深欲望聖慈明降詔書嚴行約束今後中外臣
僚已係擢任若提點刑獄已上並不得薦舉如有所
舉無名所稱不實違犯詔旨並仰御史臺察訪事由
彈奏伏乞重行朝典候勅旨兼近年以來中外臣僚
奏舉官員內有人品庸常薦章交上亦有宿負罪累
迹狀醜濫者乞行雪復奉聖旨令降勅戒勵

勅朕制臨天下思與賢材而共治之故開薦舉之路又

於羣臣無有疑間故所薦舉多亦陞任然比年以來或
所薦者材資茸薄加之品目下人遠甚然有公卿交牘
稱道或宿愆醜濫曾非招註請行滌復或職任疏遠不
稱重輕引援清近迹其本源豈非造請銜鬻者傍依權
門無廉耻之行交結恩私者苟蔑王爵無公共之志不
然何以臻此不知不賢而言之茲曰蔽感知其不可而
言之茲曰欺罔左右官師懷此事上嗟予何賴誠心未
孚遂致於法朕甚愧焉其令御史臺察訪中外臣僚奏

薦如有所舉非其人者立須彈奏必行之罰宜自近重
茲伸警尚體予意

廣南轉運使元絳奏南海洪聖廣利王獠賊至廣州城下官吏等屢禱有應乞加崇顯之號奉聖旨

特封昭順王制

皇祐五年

勅易載害盈益謙之旨蓋神道正直必有輔於教也厥有陰相吾民沮遏兇醜應答明白不列美稱曷以揚神之休南海洪聖廣利王惟王廟食尊爵表于炎區年既

遠矣唐韓愈記稱神次最貴且有福禍之驗國家秩禮
祀等尤高康定中朕嘗增王徽名牲幣選數罔不稱是
今轉運使絳言乃者儂獠狂悖暴集三水中流颶起舟
留三日逮至城闔廣已守備火攻甚急大風還燄閉門
渴飲澍雨而足變怪屢見賊懼西邈州人咸曰王其恤
我者耶朕念顯靈佐順靡德不酬其加王以昭順之號
神其歆茲顯寵萬有千載永庇南服

廣南東西十一路轉運使提點刑獄揀放配軍勅

勅朕臨馭海內念憂元元冒以至仁期於遂性比因郊
祀赦宥辟刑顧惟羈隸之人特解錮留之負或能悛省
不仍舊轍者遷移便地或加瘡老不能自力者去籍遣
原列郡守符監州使能悉心按視以稱朕懷

皇姪故左衛屯大將軍信州團練使從質可贈觀
察使追封侯制

朕惟至治之主本於仁愛內澤宗族以化於下矧予是
弟之子親於屬籍年不克永朕甚悼焉具官某忠恪以

立朝信厚以行已久更環衛薦歷歲月休有令善著於
羣聽今其殞逝重以優恤增廉使之秩啟侯社之封飾
終之恩於斯為厚惟汝之靈歆是嘉寵

司農少卿致仕呂士宗男克禮可將仕郎試祕書
省校書郎制

以爾父久歷煩使方茲引年命汝以官往試祕省夫仕
宦善歸而嗣子有祿始終之典可謂厚矣汝其勉勵以
稱恩寵

前光化軍乾德縣令同監秦州西溪鎮鹽倉徐介
前湖州觀察推官監台州黃巖鹽監張侗可並著
作佐郎制

勅國家爵賞之設以待賢才計秩遷官殊非本意然殿
則有罪而最或不遷又非所以馭吏之法也爾等並緣
保薦分幹權利校課所當宜在陟典夫先中文詞之科
今列譏述之局其資盛茂爾宜勉之

追官人前朝奉郎成端夫行太常寺奉禮郎制

勅具官坐墨奪官理宜廢棄屢更歲月或能省循叙還
京司實為恩渥勉新刷故以務後圖

尚書兵部員外郎直史館知滄州田京可工部郎
中餘依舊制

勅具官廼者大河之北遭罹水患板戶貧困冗散旁郡
朕甚愍焉屢勅所部每加矜恤人情懷土而未聞還集
汝京所守濱海都會襟帶之固兵民所聚而能上體予
懷下究民隱申慰勞來歸占者衆使者條狀願為褒異

文昌草議起部要司命汝踐之用為增秩夫計功實與累日月而遷者固有異矣汝念此意撫安居人可

龍圖閣直學士起居舍人李絢遺表男將仕郎守將作監主簿秬特授太常寺大祝男秬特授將仕郎守郎守將作監主簿制

勅某官某男某等朕念乃父早中科選以文華深厚而居詞命之職以材智聰明而付浩穰之治方膺外補奄爾淪逝錄其嗣子以伸予懷或遷與禮臺或麗名匠寺

並為優寵勉自進修

儒林郎守雅州錄事叅軍兼司法事田九思特授
太子中舍致仕將仕郎守真定府平山縣主簿宋
象特授守國子監丞致仕制

勅具官爾等久厯州縣願還官政念其退止宜伸恩典
或進與官坊或叅名庠序持此以歸示於閭里亦足以
為光榮也

兵部員外郎知制誥胡某可依前兵部員外郎充

翰林侍讀學士仍舊判銓制

勅朕念君人者左右前後皆正人則諷諭顧問之間莫不循於治道故侍從之臣心在精擇而况觀學之職尤其重者自非飭躬端慎濟以文業則不與其選也具官某勁清有守臨事不回記問該閎屬詞精敏久居禁掖日有嘉稱今命爾以金華之要爾其考聖人之言攬前史之載有以發智慮之明作安危之鑑者附當世之事而為朕論之使授受之際謂之得人豈不美歟

兵部員外郎知制誥何某可依前兵部員外郎充
龍圖閣直學士知秦州制

勅朕惟關陝之右冀門為重內宿兵師百萬之衆有政
令之決外連羌夷千里之遠有綏安之略必欲恩威行
而士伍服信義著而種落附非有文武之資者不可以
輕授具官某爾以文雅中詞科以智敏被器使典訓謨
之職而復於深厚歷官守之政而濟之果斷會秦關帥
慎擇其人惟汝之能斯可往治輟自禁垣之要增以內

閣之嚴若夫入叅侍從之聯出委藩翰之寄士林華選
爾實兼之隴道之雄為天下首講訓綏輯控制外虞使
朕無西顧之慮者爾其望也勉楫勲績以稱休命

奏舉人前邢州錄事叅軍褚士言奏舉人前潞州
上黨縣令正王世範並可大理寺丞制

勅具官某等天下郡縣之吏其員以千萬數材之與否
莫可周知惟監司長吏以善狀保薦者則校閱閱而升
獎之以勵能者爾等効官有勞而舉者又以連罪為任

往丞棘寺並為優陟夙夜思省以答茂恩

追官人李君俞授大理評事制

勅使汝為倉庾之吏而粟不可食奪免一方以戒不職
今所監之司皆曰向以西事應猝便辦蓋無他腸又所
輸粟移之秣飼厥數不減屢更郊赦之澤請還京寺之
僚吾其從之爾當自省

前宿州臨渙縣令郝周授太子中舍致仕制

勅具官某受吾俸祿驅馳州縣至於衰老今其歸也不

念其力乎遷與儲坊為爾光寵

未復舊官人內殿崇班李昭素復內殿承制制

勅某汝嘗失刑民死非罪奪官既久省咎則多復禁省之舊聯實朝家之優渥勉遵成憲勿蹈前為

如京副使兼閣門通事舍人侯宗亮可特授西上閣門副使制

勅具官某帝者日臨法宮以朝羣臣宴御便坐以講庶務臚傳辭令之美贊相規儀之多惟二閣之權允司其

事予欲擇其能者非敦良敏茂之人莫能勝其任也以
爾其資性格毅器質淵通周旋軒陛之間屢更寒暑之
變宣納夙夜罔有不勤出入禁嚴罔有不慎叙爾績効
進貳使名朕左右之人所籍者雖衆要近之職得與者
無幾汝益修勵以稱寵靈

前開封府祥符縣尉趙偕可著作佐郎前趙州錄
事叅軍范孝思可大理寺丞制

勅具官某等郡縣之下勤勞職事歲考滋久而能謹檢

操履為保任者所知者朕常與進用以勸焉爾等咸有吏資著于銓筦條列績閥當於陟典或叅祕丘之選或進理寺之名各服寵章益邵來效

故大府卿畢世長男試將作監主簿從益可授守將作監主簿制

勅具官某男某以蔭入仕深歷年所進列卿位屢更藩翰因其淪逝閱其子姓一門之內咸列官簿然恤孤之典朕乃不忘唯爾從益頃試匠寺今與即真爾母不勤

以墜寵命

東頭供奉官薛讓可內殿崇班制

勅具官某向以馳駟邊障將命往還既涉歲月不尠勞
止升聯殿陞視秩朝闈茲為褒渥之隆用勗官成之効
往欽爾次無怠厥修

江州彭澤主簿閻旦可守國子監丞致仕制

勅具官某占名中銓逮于暮齒謝還官政退休其家念
爾知止進承上庠往服茂恩以安汝志

故廣惠等八州沿海都大捉賊西京左藏庫副使
武日宣宜特贈忠州刺史制

勅具官某綏懷之德不及蠻獠至使拔其種類寇鈔嶺
外徑趨青海鋒氣尚銳爾惟邏巡之職實司翦捕而能
忠果挺志勇毅自奮身先士伍轉戰不已兵力失利殞
於鬪格遠聞予聽終夕悼惻特推恤典列於刺部忠魂
如在歆此哀寵

故知封州殿中丞曹覲宜特贈太常少卿知康州

贊善大夫趙師旦宜特贈光祿少卿制

五嶺之表面內以來南連海澨西屬蠻峒未嘗有鳴桴
之警故守封之臣幸其無事莫為戰備廼者獠衆猖悖
乘襲疆場爾等並分符竹對典州郡當賊鋒銳亡身殉
國嗟乎城池不足以為固甲兵不足以為衛陷於非命
傷惻良甚恤恩之厚並貳卿列汝其有知承朕此意

故乾州安遠會昌縣巡檢闕禁董玉等宜並特贈

禮賓使故賀州管界巡檢殿直趙允明等宜並特

贈南作坊使制

勅具官某國家設警巡之職用以誅磔寇盜撫安人民
有能死其官者朕嘗旌異追進名爵收錄子孫所以表
忠義也蠻方猾橫弄兵嶠外爾等咸以忠勇疾憤狂寇
擊刺襲躡遭罹不幸朕為人父母而使汝等身膏草野
妻孥望祭萬里之外心焉哀惻其何已耶特寵使名以
慰幽路靈其不泯歆我嘉命

廣南西路鈐轄下捉殺故奉職長用和宜特贈內

殿承制指使三班差使張亢等宜並特贈內殿崇
班制

勅具官有生而死磨滅者衆為忠魂蒙烈雖沒不忘汝
等參於裨校往捕寇攘矢石之間殞其軀命朕心哀愍
特優恩恤追榮近墀賁終幽窆冀爾靈魂享是嘉寵

故賀州司理叅軍劉冕宜特贈左贊善大夫故英
州攝官李稹宜特贈光祿寺丞制

勅具官某等並為嶺外州縣之吏屬以蠻峒猺蠆毒我

列郡恃兵跳梁殺辱紳笏汝等並懷忠節捨生不屈朕惻然義之特行哀恤追褒宮室榮贈宗司靈其歆之良慰汝志

步軍副都指揮使觀察使張茂實可馬軍副都指揮使節度觀察留後制

天下之本在於京師而宸極之下必有材勇之士居則拱扈威陣出則番茂外國分建三帥以治其政茲率故典厥惟舊矣今予有百千萬數精銳熊虎之衆曾是強

毅有能為予訓忠義之節明法令之禁者吾其用之具
官某有沉敏之才通夫將略有謹厚之行達于予聞擢
領萃屯翊侍軒陛惟時蚤夜罔違靖恭遷兩使留務之
名總萬騎選鋒之勝車田符籍爾則專之噫以嚴一衆
其術匪難服于衆心其道匪易平直無頗情乃上貢廉
明不撓惠乃下究委注惟重欽哉惟承

馬軍都虞候王凱可殿前都虞候步軍都虞候王
達可馬軍都虞候制

勅國家列三帥以治拱扈之師設虞度以貳董齊之政
非有沉武之資敦信之實者無以條理尺籍嚴威環衛
朕嘗於是擇而任之具官某用之邊圉敢於戰格而服
其士伍具官某遣之戎禦奮其材勇而聲在戎漠咸以
勲績分提禁旅藉其能力尚取彊陞外陪殿陛之崇佐
護騎屯之次候奄至重倚信彌親爾其下達於衆情上
裨於長政恭勤一志毋懈厥初

韓絳可右正言依舊直集賢院同修起居注赴諫

院供職制

勅具官某百執事各修其政而諫諍之臣得與國論其
職要其責重故難其人先朝命置六員而終不克備朕
每擇是官必沉慮久之而後行信乎其人之難得也惟
爾絳擢在高第屢更器使執心方勁落落自立今易處
西省往備諫列若夫罷軟而畏權要附阿以希進用徼
訐以干譽煩碎以欺俗有一於此茲謂壬人術學通於
大體言議中於至理弼違箴闕以輔不逮知而必為靡

悼後患有出於此茲謂正士予期汝絳作予正士可不
憚哉

前蘄州黃梅縣令兼監稅申房可漳州錄事叅軍
監京山稅制

勅具官某向治征筦最目有勞督儲曹於外邦商美利
於劇邑關市之務本以察譏爾屢為之母或苛撓

睦州司理叅軍諸葛寘授試祕書省校書郎知真
州楊子縣事為捉賊温州永嘉縣尉韓鉞可萊州

即墨縣令制

真一作冥

縣道之設尉屏兇盜而護善人所以助令興治者也空
官有罰敕職有賞而勸沮行焉爾等捕除攘奪咸應遷
格或試祕省分治劇邑有民有社可以為政勉楸平直
以稱褒典

深州司戶叅軍李德宣守大理評事致仕制

勅具官某士之壯則從王事老而歸則教鄉黨未嘗不
為善以助治也汝椽于劇郡逮於暮齒願還官政引卧

丘樊遷丞京司以需朝渥爾之仕與歸亦有助於治歟
可

端明集卷十

欽定四庫全書薈要卷一萬四千五百十一

集部

端明集卷十一

宋 蔡襄 撰

制誥

知秦州龍圖閣直學士何中立男景先可特授將仕郎守將作監丞制

勅具官某男某以爾父輟自禁垣徃帥邊服在注倚之尤重必寵數以兼優爰露奏封請任其子命丞工監之列用為侍從之華勉勵清修以永多慶

范仲淹男純粹等四人授守將作監主簿制

勅故資政殿學士戶部尚書范某男純粹等仲淹素竭忠力勤勞王家不克永年奄爾淪逝嗟其材賢不可見已竝錄子姓逮於族親或列名京僚或試秩監省始終之典予唯不忘清白之訓爾宜自勉

范仲淹親外孫賈公直試將作監主簿制

勅某朕以仲淹勤勞王家忠義一節奄爾淪謝悼予予哀錄其外姻試秩監省勉思所立毋忝異恩

前福州錄事參軍李守寧特授建州錄事參軍監
滑州大翟村酒稅前廣州司法參軍劉汝翼特授
漳州錄事參軍監陳州南頓縣酒稅制

郡督郵之任蓋所以紀綱政治糾司過忒惟強明幹敏
者乃可為之以汝等嘗歷諸曹復有歲最寵以都掾之
目蒞于征榷之局夙夜思勉毋空厥官

開封府推官屯田員外郎王礪可依前官充開封
府判官尚書度支員外郎孫錫可開封推官制

勅具官某等材不敏明不能決穰劇志不强果不能糾
豪勢法令不通不能繩姦吏賦役不均不能恤百姓予
惟京府之職嘗患四者之難故求其人以貳尹政以爾
礪雅有吏資嘗叅憲職試能滋久恢然餘裕以爾錫麗
名詞館平覆刑書將歷要塗必更幹任竝佐浩繁之治
且觀贊助之方服予訓言以竭忠力

太常少卿新差知兗州徐起可光祿卿制

勅具官某趙魏之域為天下重宿兵聚粟以鉅萬計汝

起鄉為使者將漕鄰部輸置金繒以濟須給嘗以陟典
減從近歲德推朝渥乃正卿秩宰膳之寄尤為嚴近勉
圖績効以稱嘉寵

知撫州都官員外郎李先轉職方員外郎制

勅具官某爵賞之貴以馭于下凡與遷進必校勞實以
爾嘗歷臺署往涖民政績移歲筦居有功伐在法應陟
予何啻焉郎等唯三乃踐以往膺褒前進益櫛勤力

三司度支副使兵部員外郎曹永叔充天章閣待

制知福州制 永一作穎

勅朕念善為維持之策者運天下如臂使指欲其大小
相臨而威令必達故也東南之郡長樂都會表山環海
地險而遠八州生聚繫乎總帥非有幹明之資能辦吾
事者不可以遣具官某智力精敏應幾必決薦更器任
籍有聲稱將漕益部還貳計省而猥繁之務罔不給肅
今屬以方面之重寵以延閣之華爾其繕除兵械補完
城堞懷綏困窮翦遏兇猾使吾人無愁苦之嘆朝家有

專倚之賴朕志惟是爾儀圖之

刑部郎中充天章閣待制知慶州張昇可依前刑
部郎中充龍圖閣直學士知秦州制

勅侍從之臣雖出撫方面每被美名以為光寵況內閣
之重苟非耆儒厚德或材通器任者不是與也具官某
方嚴出於天性識慮成於學術向在臺省有鯁亮之稱
逮臨邊圉有綏靖之略朕念冀門鉅屏羗夷雜處板戶
繁富軍旅屯萃今升以祕圖之職屬以隴道之事汝久

泣戎政備體忠力無復多訓尚服休命

尚書都官員外郎郭申錫可侍御史制

勅郭申錫御史府之職正紀綱繩愆繆外以肅官師內
以獻忠讜名為清要固難其材朕尚令近臣保薦庶乎
得人知雜御史擇行以爾申錫塞詔擢自郎署之列往
膺柱史之任汝有鯁正之志精通之議必竭爾慮以達
予聞

太常博士趙琪特授尚書屯田員外郎國子博士

宋詢特授尚書屯田員外郎制

勅具官某國家遇官人者之意甚厚凡三歲則比其殿
最按其所當而升黜之其間雖無較然治狀之明而能
廉謹自守者亦不遺也爾等監視州郡或臨縣邑計年
應法用遷爾秩郎官清列推重於世咸務循勉以稱恩
渥

縣尉劉宗旦授錄事叅軍監酒制

勅具官某汝尉于縣而能禽誅寇盜謹飭其職攸司考

課當乎賞等升郡紀綱往臨權酤自力來績以報甄錄之異也

渭州新寨東頭供奉官韓周授內殿崇班制

勅具官某保鄣之任刺視疆境護防居人幹謹其事逮夫三歲斯亦勞矣遷與禁墀之列通聯朝著之榮虔思茂恩以立來効

內殿承制高允元授供備庫副使制

勅具官某祇事內廷素尚忠謹寔延歲筦益著勞能使

介之名禁墀允重特推渥澤俾進崇班勉敦夙夜之勤
庶荷褒遷之寵

維州昌邑縣主簿張白授大理寺丞致仕制

勅具官某向從祿仕謹身無咎今謝官政推恩惟厚讞
刑之秩顯於京曹被榮而歸寵爾衰暮

樞密直學士給事中程戡可依前給事中充端明
殿學士知益州制

朕撫馭寓內恃之久安使上澤周達遠情不壅者蓋有

賢能為予鎮守方面爾蜀道天險劍外遼絕每委帥臣
俾之專決列城側首以承教令今之借威權託腹心者
無與為比其於選遣宜輕也哉具官某以文中高科以
材任煩使入居憲臺而豪貴斂迹往臨藩翰而孤惇蒙
福回翔禁近號為恭謹獻納謀議關於機宥升榮祕殿
分寄益部形勝謠俗汝嘗知之夫以刑制民畏而不戴
寬恤征賦使之便安予爾賴焉爾其勉力

西京左藏庫使沈惟恭可遙郡刺史依舊西京左

藏庫使制

勅具官某刺部之雄在克尤重今雖遙制必勲勤戚舊者然後命之以爾早由武材久處禁職間有疇勞之舉與其滿歲而遷申復朝恩俾司郡契益思勉茂用對寵靈

故石中立親孫祖冲可試監簿制

進祖文集

其人惟爾祖中立嚮以文儒參與政柄忠朴淳謹為益良厚而其淪逝之日既久爾能纂緝遺篇削藁來上追

念曩輔惻然不忘京監開榮用顯存沒爾宜脩勵無忝
茂恩

太常博士王璟可屯田員外郎制

勅具官某爾在邊帥幙府旣以材智贊其方略又以經
營儲粟備辦豐實按格所當宜有遷陟文昌郎位為仕
清選用疇爾績恩澤甚茂勉務來効以答褒進

樞密院賈德明任承睿可都承旨制

勅具官某等樞宥之府所承稟而宣行者皆禁密之命

必求謹厚之材乃可備於陪屬以爾等有恪愿之資加肅給之敏麗名機務實唯勞舊按其資歷擢總綱領勉思勤蓋尚副褒寵

樞密院張繼渥可承旨制

勅某人蚤以材敏屬麗樞庭績延歲月之勞益敦夙夜之恪進承旨命特示寵榮祇荷恩遷愈罄誠志

都官員外郎知坊州毋湜可侍御史制

勅具官某帝者常欲達聰明于外而與議者重於得人

卷十一
士大夫嘗欲獻可否於上而抱材者難於得位朕侍臣
拱辰言爾提端方有學可以備憲臺之職擢自郎署典
于柱史爾以儒進當通理道之要歷更外使固知世務
之本繩違正失罔戾厥中服命惟虔益楙而志

皇兄故懷州防禦使承幹可贈保靖軍節度使追
封蕭國公制

勅朕嘗覽前史天子之宗族有惇良之行終始顯榮者
固已稱歎況予弟兄躬是賢德存則接以恩禮歿則伸

於哀祔所以勵於本支而儀于天下某官某承流慶源
敏稟善性持信厚之誠而表於屬籍竭忠盡之尚而壯
于藩翰天年不永奄罹殞逝臨酹傷惻特加愍贈飾以
齋鉞之重躋夫公哀之列靈其不昧歆是休命

皇姪孫故右屯衛大將軍世宗可贈防禦使追封
侯制

勅帝道尚親所以廣恩而推愛也朕於宗籍惇睦良厚
其有殞奪每加褒典具官某貴聯天屬躬蹈義訓飾行

有恭靖之美嚮學有沈敏之善已叅環尹久奉禁朝遽
此云亡予實汝惻進扞防之使紱仍疏啓於侯封塋魂
有知尚歆榮渥

追官勒停人任達可濟州司馬致仕制

達一作遠

勅某官向臨征筦之局妄加刑罰於人在法所當奪官
而廢憫其老疾特示寬優方州典午之曹憲臺柱史之
目率為兼命宜體厚恩

崇班閣門祗候李樞可供備庫副使制

勅某官獠衆弗順寇鈔嶠南州郡用兵調發饋給爾為
使者循行往來按視良苦升榮禁闥就總戎鈐勉圖茂
勲思對優寵

前廣信軍司理叅軍王塾可衛尉寺丞制

勅某官某國家邊陲之事必以兵師申其威武然儲峙
食要務於流行使者以爾勤力收斂補於漕輓升榮京
窠圖厥勞効勉勵爾志以答恩渥

李宗儒可內殿承制

勅具官某爾以武材往涖邊堡種落懷附斥候甚明眷
言帥臣遠形需奏特升聯於殿陛俾耀寵於塞垣勿忘
欽承勉立來効

葉均可大理寺丞制

具官某官賞之法所以磨勵世俗旌拔賢材然有勞而
陟與累日而得者差異也爾治劇務復積歲功於格應
遷命丞理寺勉脩成業以稱寵靈

齊州司法叅軍監秦州在城酒司馬京可衛尉寺

丞制

專筭利資以佐公上必用廉飭乃有羨贏計課應遷京
曹是踐勉尚脩勵祇荷恩褒

陝西轉運使范祥追官知州制

勅具官某爾為使者權泣冀門建言羌酋願上土壤國
家不贏尺地之得尚安遠人之歸再屬經圖務存久靜
爾深陳便利堅請完修但知開劃之勤殊失預備之策
致茲寇盜乘隙鈔攘興戎之端厥咎誰執奪去一秩典

臨外州實為寬矜勿忘循省

右龍武軍大將軍克棟可右衛大將軍制

勅帝者宗屬惟是飭愿自守其履尚固可嘉矣況乎潛
心經術發揮詞業不有恩數之厚曷以勸示來者具官
某植性端靖頗務詞學屢形章牘願較藝文給試禁署
預列名等特遷環衛之重以疇稽古之効益思為善以
對光寵

供備庫副使李評可朝散大夫殿中丞祕書丞宋

敏脩可太常博士守監簿楊慥可太祝奉禮郎制

逐人學士試到
奉聖旨與轉官

勅具官某等天下以文治而士人以詞進者為日舊矣
惟爾評生於貴戚早聞善訓綴學屬文特然有立敏脩
暨慥世以儒聞能名其家經術益茂命試列等粲然可
觀或遷殿省之聯或舉奉常之列率為恩渥勉務敦脩
皇姪故左武衛大將軍常州團練使宗道可贈觀
察使追封侯制

勅惇睦至親故事之重褒顯令德治道之先矧惟宗藩
之亡宜有哀憐之賁具官某知為善之樂篤好學之心
棣跼承上以光華麟定應時而信厚久司環列之重遥
總州兵之雄天奪厥齡予深其悼命以觀風之重徹茲
書社之榮冀汝營靈歆此恩寵

西京左藏庫副使帶御器甘昭吉可特授文思副
使制

勅具官某性質溫茂材資幹明久叅省戶之嚴仍寄帳

兵之信服勞益謹第課應遷優陟使聯用推朝渥勉敦
爾志以永厥成

狄青奏平變賊有陣前陣內使喚得力人都官員
外郎鄭紆可職方員外郎石贊善大夫馮炳可授
殿中丞制

勅具官某等向以狂獠肆毒嶺嶠之南臨遣帥臣往殄
頑兇爾等皆以材敏實從征行還上功次之條宜有遷
褒之澤序升郎位擢與省丞竝為恩榮勉務修飭

監簿余仲荀可太常寺太祝制

勅具官某等向遣樞臣平定戎寇還上功狀之實未紀
驅馳之勞爾等咸以材能嘗與軍事或進祕丘之列或
升禮寺之華勉圖進修以對光寵

入內東頭供奉官梁惟一可大將軍致仕制

勅具官某天資粹謹材幹敏明久叅宸內之聯比嘗任
使之劇日親藥劑屢易歲華備陳懇實之詞願解信要
之職擢於環尹俾遂家居終始之榮汝其至矣

大理寺丞知梅州許士廉可特授太子中舍依舊
知梅州制

勅具官某等百粵之壤風土異宜爾分守符實處嶠外
積勞累歲具于有司最要之凡合於遷格進陪宮臬仍
涖方州祇荷寵榮忽忘省飭

皇后妹仲翹新婦宜特封鉅鹿郡君制

勅樞躔紀節茲乃慶辰綸渙推恩厥惟典舊矧乃后宮
之戚宜推湯賦之華某挺生慶門早服柔範動靜鑒於

圖史夙夜謹於絃綖嬪于宗英著厥閨則宜徹郡田之
號益峻封君之榮思榭懿恭用欽寵數

貴妃妹宜特封清河郡君制

誕慶講辰睦姻疏寵眷惟妃位之重願推女弟之恩舊
典具存明命斯允某生高華之族稟茂淑之姿從姆教
而甚嚴奉閨儀而愈慎親為外戚陪嘉節之祝延地啓
名邦峻封君之等數宜思優渥益荷顯榮

供備庫副使王用可西京左藏庫副使內殿崇班

張玉可內殿承制

勅具官某等前遣專師平定狂獠還列功次第推恩賞
近因振旅引對便坐陣行分合而中法士卒擊刺而奮
勇再遷使秩式承制旨竝為旌寵宜楙忠力

前兩府并兩制聖節奏弟姪京官或試監簿制

慶誕之節公卿在位忤呼稱壽罔不和悅朕嘉與近侍
共樂無疆恩于而家用為榮寵命爾京秩漸于官政力
圖德業毋懈夙夜

宰相叅政樞密聖節奏薦子孫各京官制

近以誕慶佳節惟一二弼輔之臣奉觴以上千萬歲壽
誠懇精至詩不云乎無德不報乃以保任之法除子孫
官列于京司所以彰朕之意而登爾於士也可不憚哉
樞密院令史武世長于可久並內殿承制制

爾等陪屬宥府幹敏著稱從征南方復主符籍以謹密
歲年之舊加驅馳戎馬之勞積是最成宜推渥澤升聯
殿陛傳奉旨辭甄獎之華往服于命

封州司理叅軍林詢被蠻賊殺害贈大理寺丞制
頃者盜起南服震驚朕衆汝掾州郡遭罹非命盡忠隕
首誠節可尚讞刑之秩用賁幽宥

贈太尉追封永嘉郡王允迪長女左侍禁錢隆楨
妻可特封郡君制

慶毓嘉節率均恩渥矧惟宗藩之逝藐焉息女之愛形
于薦引當列封號徹名邦之華壤厚敦族之懿典褒與
之重爾宜欽奉

東頭供奉官唐中和可內殿崇班制

勅具官某蜀險而遠欲以知風謠情狀者必擇明曉事
機之人乘驛往來以通上下之意奔走三載厥惟勞止
此其還歸宜有敘進殿墀之峻朝紱之重爾宜勉力以
報優獎

樞密使檢校太傅戶部侍郎高若訥可尚書左丞
充觀文殿學士兼翰林侍讀學士同羣牧制置使
制

予觀前世君臣之際進退以禮始終以義者厥惟鮮乎
故予於左右承弼之人尤其慎者其有竭忠淳以謀大
體者必度材器而任之均休勞以避要途者必增名數
以寵之所以敦其君臣禮義之至者也具官某志尚沈
靜才邵明敏博學窮遠古之遠精義達萬奧之微進以
儒術居然國器寘於諫垣則有獻替之論列於延閣則
有顧問之辯嘗更外劇旋長臺憲敷納惟允聞望彌著
入叅宰度遂正樞庭幄中之謀處而必中堂上之畫知

無不為屢陳懇悃之言固辭宥密之重若乃總文昌之
要增祕殿之職日與金華之議兼涖天閑之政併是優
寵所以示朕之眷賴而彰爾之謙退其往踐之尚體茲
意

端明集卷十一

欽定四庫全書薈要卷一萬四千五百十二

集部

端明集卷十二

宋 蔡襄 撰

制誥

樞密直學士給事中孫沔可樞密副使制

朕惟上承宗社之大下撫人民之衆其出命令治綱紀者維一二輔弼之臣而已所以夙夜思慮敷求俊賢矧茲宥密之嚴專治兵夷之劇苟明不足以知王體材不足以辨吾事者其可用之耶具官某以文業進身而能

果自任智略如車輻之湊論議若泉源之流嘗居諫垣
號為鯁亮逮叅延閣屢更器使頃年羗戎懷貳邊疆多
故將漕關中有輔流之術鎮臨塞下有威懷之稱班旋
于外夷曠一心近以峒獠肆狂嶺服騷動寇勢莫遏民
愁不聊特輟冀門之行往當邕管之事果殫策謀之勝
仍親行陣之危天威一伸兇醜大潰比旋師旅願謝官
榮蓋寵故鄉之歸命治全吳之重蔽自朕志還貳樞庭
擇材任官時議惟允噫萬兵之衆在乎區處四夷之遠

在乎撫定爾其深惟眷賴益勵忠力交修不及輔成大務將朕有知人之明而爾有濟時之美可不勉哉

利州路轉運使解賓王男遵範可授試祕書省校書郎制

勅男某以爾父輟自計府將漕于外引援恩典推延予姓名試祕丘之秩用為使者之寵益務修飭以對褒渥濟州防禦使并代管內部署王仁旭可起復雲麾將軍依前濟州防禦使差遣依舊制

勅三年之喪不從政所以明子道之本金革之事卒哭而不避所以著臣節之大故恩以伸愛義以奪情禮有從權蓋不獲已而為之也具官某世風紹於前人武略長於馭衆處方郡扞防之重屬邊圉總護之雄屯萃肅齊侯鄆嚴靖奄羅家禍求解兵麾念門內之治則必志難從遏塞下之虞則匪材弗克宜節棘鑠之戚勉循墨衰之行苟忠尚之不忘亦孝誠之已著體茲眷賴往服

訓言

著作佐郎知秀州嘉興縣蔡準可祕書丞差遣依
舊制

勅具官某三歲一考吏治績狀有材廉之稱無失繆之
舉者從而遷之所以勗勵來者以爾業文中科佐著作
局歷官清白嘉有能最即丞舊省仍蒞大邑勉隆政迹
以荷褒寵

前光化軍乾德縣令國子監說書吳幾復可大理
寺丞制

庠序之設所以起風化而養賢材也其於訓導講說尤難其人故業官遷秩差異常等以爾幾復善談經術甫更再歲薦任交上當夫陟典與名理官蓋寵優次勉懷儒尚用荷邦榮

供備副使張玉盧政可並特授供備庫副使制

具官某等自二廣平定以來完修城郭增繕器械屯宿兵防保障邊圉以爾等材武沈毅志尚驍果即正使聯之重往蒞軍鈴之政務存遠略以靖遐服寵渥之數宜

勉成効

隰州石樓縣令齊惲可著作佐郎充大理寺詳斷
官制

勅具官某國家興定百年事為之制四方守吏一法為
治中都官寺刑書所聚持平處議當表天下爾以材資
久被薦引叅試具獄咸中準程遷榮祕丘仍居理讞文
同而比異令具而犯輕勉是審詳以副欽恤

開封府法曹叅軍張友賢可大理寺丞依舊知法

曹叅軍公事制

向繇銓選作掾京府周歲飭職議法平直薦任交上比
援遷格升名讞理之秩仍處屬曹之列益思勤蓋以答
甄獎

試祕校知秦州隴城縣監環州折博務楊京可著
作佐郎制

勅具官某邊陲互市之局不唯寵利以助資費蓋於輕
重務得其要爾居是官既亦三載收括餘羨第在遷賞

祕省清秩用為疇勞愈虔乃心勉尚修立

選人授錄事叅軍監茶場制

勅具官某等摘山之利歲資支計其數百萬然而蒞局者因循至有貨居而不行滯留月久有司請寬資限博取材幹以辦其事銓選爾曹以塞朝旨進以州掾之秩往臨管權之務勉尚廉敏賞豈吝哉

太廟齋郎勾勉可將仕郎試祕書省校書郎知嘉州夾江縣監果州商稅制

勅具官某以資入官未更職任而能果勇自力捕除寇盜比拔遷格宜被甄獎試僚京秩序次縣章仍臨征筦之繁益懋廉能之最

太子中舍于壽京東轉運司差勘青州臨朐縣令張師尹進狀冤枉其于壽奏案中入閒詞譏詆朝政制

具官某以明經中選治邑効官承監司之符文鞠部令之冤訴證逮在遠時月其延輒恣譫詞編著具獄始攬

奏牘嗟其易心及茲問狀之來彌見得情之實實于法
議宜在嚴科屏之仕途用懲捐妄尚念前王之德或恕
狂夫之言止降宮逢之聯尚臨征筦之局體于寬大益
自修省

奏舉人前權蔡州觀察等使張仲卿可大理寺丞
奏舉人前權河中府觀察判官楊愈可太子中允
制

勅具官某更繇銓筦而進者皆先以閱閱達于予聽慮

夫一士周旋申覆然後處其進退便坐呼引視按材品
乃決其事凡脫州縣之職登京師之列如是之難爾其
日思茂恩益修業履

左領軍衛大將軍宗績新婦楊氏等三人可並封
郡君右千牛衛將軍仲諭等新婦一十人可並封
縣君制

淑惠秉心柔明遵禮挺生華族嬪偶宗英益修婦道之
嚴式表閨儀之重屬茲誕慶舉于大宗特推疏邑之封

用獎宜家之美勉終賢範茂對朝恩

澶州通判國子博士孫奕刈到芟草四百萬轉運
使乞酬獎與轉官知通利軍制

勅某官書曰德懋懋官功懋懋賞今之疇勞以官試與
古異然有勞而遷於計歲月而例循資級者尚有勸焉
以爾向為監郡瀕於大河割聚捷薪餘四百萬陞與郎
位典刺軍壘

奏舉人儀州軍事推官監楚州排司張唐民可著

作佐郎奏舉人前權知榮州軍事推官張暹龍可
大理寺丞制

勅具官某等凡職于州縣者去朝廷遠甚故責之上官
以設保任之科關於銓筦以修功實之最審察能否而
後遷焉者歲餘百人不為不多然漸而器使益難其才
以爾文藻溫瞻吏資敏明陞與京曹用勸能者益圖績
効以稱予擇才之意

大理寺丞文恭祖可右贊善大夫制

勅某官以爾父嘗秉政鈞出臨方面藉其才智往于邊
陲眷嗣子之克家叅京曹之著位寵陞儲案仍易闕章
惟示隆恩用光慶閎楙修業履益紹顯榮

供備庫使紀德轉儀鸞使左邊任使制

勅具官某向以夷獠弄兵邊圉被寇躬率士伍力當戰
鋒雖翦逐於凶渠亦彫隕其嗣子眷言才勇宜被恩榮
遷進使聯用酬功最勉圖來効母怠忠勤

皇城副使田武可特授儀鸞使制

勅具官某選自材闕往監軍治練習邊疆之事通知士

伍之情眷惟帥臣屢形奏牘任其幹辦許以精勤特遷

幄闕之聯仍處兵戎之務勉圖忠効用答寵靈

故祕書監胡旦特贈工部侍郎制

勅治道出於人文惟儒者為能通而行之故世主右賢
以風天下國家發揮神化招徠樸茂挾經術挾詞章者
脫巖野而都卿相生享顯榮歿有祔贈可謂重矣具官
某該貫百氏之言而藻思雄瞻首中科選旋升禁掖以

材自名聲蓋人上秋逸之驥躩蹶中路晚以病退著書
見世今聞嗣續彫落旅魂未安已敕守臣給辦喪事仍
以文昌貳卿申賁泉壤嗟尔不泯其少慰哉

左藏庫副使錢師回可特授皇城副使制

勅具官某材幹敏劭智略精明典符方州總兵江峽民
俗安靖疆陲協寧逮茲還朝仍列禁省迹其功闕之最
陟于城雉之聯益尚清修勉立來効

尚書工部郎中充天章閣待制呂公弼可依前工



部郎中充龍圖閣直學士高陽關路都部署兼安撫使兼知瀛州制

國家都汴而燕趙之郊制控北道河間尤為要地今雖邊圉晏清然於遠馭之策屯敢勇之士蓄犀利之器以為蔽扞委之儒將苟非智略通敏燭見事機疇可以任其官某出於相門挺然有立持身遠於權利從政達於治經踐歷滋深風稱甚美頃以遣臨河朔之重遂升延閣之華省徭以集散以流粟以資支計列城謹於備禦

吏部悚於嚴明逮茲罷還聞嘗諮訪遷河圖之近綴總
帥幕於故關風俗所安兵民所賴皆爾周悉豈煩訓言
尚書禮部侍郎充集賢院學士吳育可復資政殿
學士兼翰林侍讀學士知陝州制

勅近侍之臣嘗更二府以叅國論有補於時者朕每念
之不忘于心具官某文業深厚顯於當世才劭端敏貳
于幾政進謀獻道蔚為巖廟之器宣仁流化屢更屏翰
之職向者甫畢家難俾處經筵庶乎諮詢日聞讜議遽

刑剡奏願就宴閒遂兼麗正之名仍蒞憲臺之重悉還舊秩分治要藩抑予爾思勿憚煩於事任

前守陵州井研縣令姚吉甫可除授山南東道節度推官知廣州清遠縣事制

勅具官某項公薦任分宰邑封爰滿歲成復從銓調奉賓游於幕府宣上化於吾人勉治政經庶光朝寵

邵州錄事叅軍監成德軍倉場給納宋航可宣奉郎行廣濟軍錄事叅軍監鄆州竹家渡制

勅具官某近監司具章以爾資材罷輒年力衰暮庾氏之職亦莫能集尚念服勞之久更臨濟涉之務益自奮勵無或空曠

福州閩縣尉李士隆獲賊授濟州任城尉與萬戶請授制

勅具官某尉能除盜時乃修官格有叙勞茲用推賞勿居近邑增界奉泉勉圖飭職之勤益荷懋功之美

奏舉人前汀州上杭縣令陳世京奏舉人前同州

支使孫有孚奏舉人前真州軍事推官石城可並
著作佐郎制

勅具官某早藉吏資遠宣邑治惟士風之尤異彌歲月
以甚勤契傳銓程當正遷格宜與蘭臺之集用欽綸渙
之華益務惇修毋忝褒命

故太子少師致仕贈太子太師任中師外甥江景
倫可試監簿制

勅具官某以爾外舅嘗貳機衡休有善狀唯其子姓克

荷家聲緝綴遺文薦于乙覽追思德舊恤及親聯列於
工監之名表乃朝恩之渥

刑部法直官前台州仙居縣尉兼主簿錢公紀可
大理寺丞充刑部檢法官制

勅具官某天下所以正明無失者共三尺法耳而秋官
考讞尤為四方所則其屬官非有敏明之資罔克勝任
以爾文華中選兼著吏稱覆閱科典既亦游歲就遷京
寺仍處舊治益飭厥職勿懈乃心

奏舉人歸州巴東縣令都宗范奏舉人永康軍錄事叅軍皇甫望可並特授大理丞制

勅具官某京司之官職任皆要與其名列必有材選今雖兼授於外然銓管而進詳擇尤重以爾等或班教條於縣道或正綱紀於郡部咸有勤稱中于遷格往丞廷尉恩渥甚茂爾宜飭勵毋或少懈

奏舉人前鼎州龍陽縣令明袞奏舉人前權成德軍節度推官楊崧可並特授大理寺丞制

勅具官某出於儒族久贊賓等居多保任之文休有閥
閱之最吏資兼敏銓覈中程陟京寺以開榮眷朝恩而
甚茂勉修身檢益邵世風

翰林學士兼龍圖閣學士給事中權三司使田况
可禮部侍郎充三司使制

勅郊廟之禮官師之稟內以贍萬旅外以通四夷經入
貨費歲鉅萬億予有近列試總大計推本儒術辦益邦
賦即拜真命僉言茲允具官某文業華敏屢中科選經

誼精博蚤奉策對踐歷諫署規箴有直亮之節延登詞
禁策訓有深厚之體周旋清密卓爾端勁懷綏藩圉蔚
然材略向繇全蜀還司會府孚予仁心而括可久之利
周國支用而削無名之斂迹其風稱朕甚嘉焉遷正使
名序進官秩屬委彌重汝無憚煩

東頭供奉官李澄可內殿崇班制

勅具官某才兼武幹名列禁嚴案最要於攸司宜進遷
於厥秩往聯文陞特視通閨母替夙夜之勤以對寵靈

之茂

勅停人左侍禁王利涉除率府副率制

勅具官某列職禁墀護兵邊圉比因朝譴願謝任途尚軫衰遲久備驅使往貳官坊之率猶兼秉奉之資歸安汝躬厥恩甚茂

試將佐監主簿張頊可守將作監主簿制

勅張奎孫某惟乃祖修身蒞官清白恭畏屢更寄委勿憚勤勞奄爾淪亡念其子姓卽正舊秩往服恩茂

按撫司奏昭州保明袁胄准赦書特與恩澤授試
將作監主簿不理選限本州教授制

勅袁胄向有恩旨嶺峯之外歷訪遺材今爾守臣與使
本道者以爾伏膺典墳不求仕進願加寵命用勸遐俗
往試名於京秩乃闡教於州庠欽服甄掄益勵誠節
戶部侍郎知鄆州龐籍可觀文殿大學士制

勅孟軻有言君之視臣如手足臣之視君如腹心蓋云
君臣一體而相須爾朕於大臣其在朝廷則覆護其所

為出而居外則念思厥勞恩數之行莫不發於予衷也
具官某素以材畧弼成大政周旋二府遂冠台閣廼者
宵人冒欺詔正厥獄猶以剋躬避闕
席鎮撫東服曾
未暮月朕懷汝能寵以禁殿之職爾身在藩屏而心實
在於左右噫永謨明欽哉茲命

龍圖閣學士尚書刑部郎中知徐州呂公綽可復
翰林侍讀學士制

勅夫一法以正羣下有抵必行示不私也人主敦仁以

覆萬物雖遠必及示有恩也惟是二柄予嘗念焉具官
某蚤以材劭久歷詞禁向尹京邑甫暮歲律中有詔獄
失於情審退處淵圖之職往試藩服之政朕於近侍眷
念不忘金華勸學悉還爾舊爾其省修以被予之後寵

河北轉運使陳旭授天章閣待制充都轉運使制
勅國家以大河之北實為藩蔽將漕大計每擇近侍以
都總之委寄尤重非通明幹正之材不可以任具官某
頃居諫列振厥職能言議忠果不避權要褒以延閣之

秩試之使領之劇而屢形奏牘力辭寵渥比臨所部甫
暮歲稔念汝誠節申錫寵命尚體朕意益邵風力

起復雲麾將軍宣州管內觀察使侍衛親軍步軍
副都指揮使范恪可銀青光祿大夫餘並依舊制
勅在親喪者惟金革之事則起之而於官號亦有異數
當其外除則復其職抑舊典也具官某志尚沈雄材武
優毅頃臨邊圉休有風稱入總環衛彌見誠効自罹家
難尚兼帥領甫終禮制之節宜被散文之秩勉思忠蓋

以報恩寵

光祿少卿知滑州呂士龍可少府監差遣依舊制
勅國家憲述前古以馭百工虞書之考績周官之大比
叅稽厥中著升陟之資以勵材者爾以器幹常敏久更
任使序進亞卿之列四暮歲歷之久舉無愆失稱有謹
厚典領三尚均秩九列寵數甚峻汝往踐之益邵忠勤
毋替爾守

如京使會州刺史帶御器械曹偕可遙郡團練使

落御帶制

勅具官某惟爾世家有忠王室清毅之訓彌遠而在爾
以材幹侍于軒闈久居內史之職兼持武帳之械動靜
沈謹志慮端恪扈從左右屢更年稔進叅團結之任尚
仍禁密之秩益宣節效庸紹風美

太常博士直史館知光化軍楊畋可屯田員外郎
依前直史館知邠州制

勅迺者南方有干紀之民命師往征屬久治平士不知

戰以爾秉心孤直禮為身檢荆蠻騷擾亦嘗殄平起於
喪廬往為帥領厥功未就言者其興退守奉常典蒞軍
壘念汝忠藎屈處安恬進復郎曹易守邊郡

國子博士呂邁可虞部員外郎制

缺

撫有疆宇竊制坤輿海南之邦悉歸

缺

蒞瓊筦

善數條教編戶胥樂屬峒無擾

缺

秩用疇守土之勤

勉務清修以稱褒寵

大理寺丞田瑋可特授太子中舍制

勅具官某天資忠順嚮慕風化任以仕籍列于京寺

缺

日傳契遷典宮儲近屬寵命惟渥勉力修飭勿怠而

志


端明集卷十二


謹案卷十一第十四頁後四行誕慶講辰按講字
疑訛

第十五頁後二行惟一二弼輔之臣刊本二訛仁
今改

卷十二第一頁後五行果殫策謀之勝刊本殫訛
無據別本改







總校官庶吉士臣張能照
校對官助教臣黃昌禔
謄錄舉人臣周克鵬

欽定四庫全書薈要

集部

端明集卷十五

三五

詳校官助教臣常循



欽定四庫全書蒼要卷一萬四千五百十三


集部

端明集卷十三

宋 蔡襄 撰

制誥

晉州霍邑縣令孫固可大理寺法直官制

勅廷尉主大平天下法令而丞史之屬必擇常通無害者任之爾以文詞中科練知吏理驗試具獄甫更游月丞于本寺用伸所能惟矜而明乃飭厥職

故東頭供奉官閣門祗候王從政妻郭氏可縣君

制

勅以爾夫向與兵戎追遏蠻寇橫罹擣刺嘗已褒甄尚
念丘嫂之孤久纏晝哭之戚徹茲縣壤俾列封君存沒
淪恩矜恤良厚

開封府左軍巡判官劉機可先祿寺丞制

勅具官某京邑惟建左右獄以治萬衆之訟尸其官者
蚤夜訊問審辯能無滯繫斯亦勞矣以爾向繇銓調擇
司其職僅踰暮歲終無回枉即遷京寺尚仍舊治悉心

矜慎無或少怠

前泰州泰興縣令充故隴西郡王宅教授陳之奇
可太子中允致仕制

勅具官某修飭行業有鄉黨之稱精明經術有訓導

缺

自銓筦勸教舊族齒髮未暮遽還官政進聯

缺

推

朝渥

闕

其祇率服于休命

大理評事知開封府扶溝縣張子瑾可大理寺丞

制

勅具官某等朕念勞而不錄則材者懈過而均進則愿者弛三年一比擢升能效其亦幾乎治矣爾等列于周行久宣風力考閱遷級庸示甄獎爾其勉飭往荷褒渥都官員外郎呂公著可司封員外郎依前崇文院檢討制

勅具官某生於相門不忸華習潛心道義飭勵誠節入遊文館彌見冲抱以三年大比之法而進爾資級勉修職業用永來譽

大理寺丞梁彥回可特授殿中丞制

勅具官某爾以文詞選於科等以材美服於王官積歲
最以居多竦風稱而甚遠序進通閭之籍參陪中省之
聯茂業益修來譽彌邵

故衛尉卿致仕張從革親孫嗣宗可試將作監主
簿制

勅故具官某孫惟乃祖久服仕塗馴至卿列謝還政事
休老家庭比間終命之期宜需錄孤之澤開榮工監朝

渥其承

西頭供奉官曹侁可內殿崇班制

勅具官某世家忠勲列在盟府河洲德美重冠坤儀屬
誕節之祝延援典章而來請躡進闕秩序通于朝日陪
軒陛之聯益顯紳裳之緒

前絳州防禦推官監晉州折博礮務徐師旦可大
理寺丞制

勅具官某漢設六筦以籠天下之利後世因之極夫纖

悉弛之則支計乏用屈之則侵牟患作惟於擇官濟務而不撓斯為得矣爾以保薦專於筦利較程資代宜有甄賞參丞理議厥惟茂澤汝其勗哉

故追冊溫成皇后弟姪授官制

勅具官某朕以妃掖之貴奄爾薨逝追崇命號特進異禮眷其族姻之大咸有肺腑之近錄親遷秩用慰存歿以爾等聯榮外戚列官京師或峻秩於奉常或參丞於省寺恩澤渥茂勿忘欽承

陝府西轉運使金部郎中李彥可司封充淮南等
路發運使制

勅具官某舊居關中歲輸山東之粟至貳百萬號為稱
職國家據汴都之會觀方來之要挽運儲廩出于江淮
以萬計者率嘗六百故其使任尤慎擇焉以爾志尚忠
果材通世務屢更煩劇隨著風稱經營秦陝之重克初
邊障之實東南將漕僉惟汝能進列清曹總賦六路然
周宣恩仁則邦計或屈一切辦事則民窮無聊勉思悉

中母重予念

西京左藏庫使張從一復西上閤門副使制

勅具官某省戶之嚴使介之近自非端良其志尚詳練
於典儀曾莫得瞻宸闥之光覲班朝之範以爾蚤登仕
路祇服官勤貳職文闡紹休先世比緣旁累嘗與下遷
逮裡事之甫成需恩華之胥浹叙還曩秩住荷新榮

內殿崇班謝禹珪可內殿承制東頭供奉官閤門

祇候王成一可內殿崇班依舊閤門祇候制

察院劄子

為汴口水勢調善
奉聖旨各轉一資

勅某官汴建廟社大衆所居支疏河流東入淮泗歲漕
南方凡六百萬贏縮之計實惟茲水爾等職在渠洫醜
閑得宜克羨歲儲時乃之力進遷資等疇叙勤績益邵
來最以稱甄獎

內侍省內東頭供奉官任修已可內殿崇班制

勅具官某參職官省祇事禁近更與器使寢積年歷嚮
惟內府條上勤庸念其材敏之資濟以恪恭之志遷聯

朝著益茂邦榮勉尚忠勞毋懈而守

閣門承授文林郎守右金吾衛長史劉慶李日新
王昭序可竝特授守中書省主事依前充職散官
如故制

勅具官某祇事宸闈寢延歲筦朝廷之文而最為知練
蚤夜之職而居尚勤廉廼者禋慶敷行恩華均被遷名
禁省漸歷榮途益務勤修勿忘恭謹

東頭供奉官王道寧可內殿崇班制

勅具官某服勤官次寢積年庸屬修最之來聞宜疏恩而下逮進列殿聯之近視榮朝宗之優祇受褒甄益尚清飭

禮賓使英州刺史劉文潤可洛苑使制

勅具官某事朕軒闥秉心恭肅服官邊圉馭下嚴整向繇隴外蔚有善稱遷使領之近聯總兵鈐於西道汝有學術必理要通知汝有材能必事機敏達守之以靜濟之以和惟其忠勤無重訓辭

特勒停人前奉直郎守大理寺丞陳佩可守衛尉寺丞制

勅具官某士之以過罹于文者雖在斥棄既開其申辯之路以盡其情加之寬大之澤以修其用可謂至矣以爾頃治大邑旁觸私累已更郊霈漸復京司往省于中勉樹乃績

追官人前承務郎守司天監主簿解文質可司天監靈臺郎制

勅具官某被累免官歷更歲律屬比禋祀之澤釋其錮
斥之文降錄舊資還齒仕籍益循檢押無蹈悔尤

尚書刑部郎中天章閣待制張昱之可光祿卿致
仕制

勅朕於羣臣進退之際曷嘗不緬然思之方其強仕發
智能以濟務則有官賞以楙其材逮其謝歸養志意以
自扶則有恩渥以寵其行仕宦者豈不懽然得其所耶
具官某立節清峻無緇磷之苟臨事明敏有批導之利

恤民以惠屏彝以嚴循吏之風聞于當世自升禁近之列屢委宣藩之重服老耄之言而知止躡疏廣之跡而告老爾其還上官事秩以列卿休于而家尚體朕意

皇姪故左監門衛將軍宗邈宗沔竝可贈防禦使
追封侯制

勅朕觀葛藟之詩得其親親之意王者必厚恩施以滋九族使之子孫繁茂盛大乃有凋落之戚曷勝予悲具官某生於豐有而稟信厚之行樂於為善而服義方之

訓每自飭勵力期修立降祥遠驗疾起鵲原宿夕之間
弟兄繼喪聞訃惻悼輟臨廟朝陞禦兵之榮名治通侯
之書數營識不泯尚承哀祔之典

大理評事方蘋可衛尉寺丞制

勅具官某吏治三載則效其勞最以進資等用廣恩惠
爾所蒞局厥貢惟薈而能厲精職業專於嚴奉督察欺
弊寬於繇作序進其等時懋爾能

前東上閤門使文州刺史李珣前西京左藏庫副

使李琪李玘前禮賓副使李瑊前供備庫副使李
琚李球可並除舊官制

勅具官某人子之於其親之喪也哀念無窮惟聖人制
順天時之安祥禪甫終起而從政國家署列武職者率
繇金革之冑以爾生於舅訓族習禮文居廬三年日月
逝矣還奉朝請再服官舊兼循忠孝勉自祇飭

尚書工部侍郎知桂州充廣南西路都鈐轄經略
安撫使余靖可依前尚書工部侍郎充集賢院學

士依舊知桂州充廣南西路都鈐轄經略安撫使
制

勅麗正天子禮樂之司非近密官不得為其副所以刊
緝述撰則為邦典顧問應對則謀王體擇選之稱尤其
難者具官某以文學歷詞禁以材智更使指向者嶠服
醜類冒抵邦刑起汝於喪廬授之以兵節自臨總制漸
格小康遽遠攬於奏封願追行於祥禪眷惟武略方倚
帥才特兼書府之名仍居經管之重勉懋忠力稱朕意

焉

追官勒停人屯田員外郎士建中特授太常博士

制

勅某官某爾以儒學名家自守師說嚮官河汴醜決失
宜奪去郎曹退居田里今予近侍薦爾才行授以奉常
之秩蒞夫征筦之局追服故法當有漸焉

服闕人歐陽修可依舊龍圖閣直學士尚書吏部

侍郎制

勅人臣之大節曰忠與敬處之者或過不及故先王設禮以為之制喪者不呼其門盡為子之志也外除而從政即為臣之道也具官某以文章直亮擇居近侍以才略器幹屢更劇任自罹家難歸伏閭里今祥禪甫畢賁然斯來文昌清曹淵圖祕職皆爾舊秩往服新命惟是移孝資忠之一義爾其欽哉

文思副使新差權環慶路駐泊兵馬鈐轄張揆可
騏驥副使兼知環州制

勅具官某武略沈雄智謀敦劭擢叅禁密之列陪與使
介之聯正班著於天閑錄教條於州檠邊防重障朝論
須材勉思撫鎮之方毋忝甄褒之舉

軍都指揮使都虞侯可四廂都指揮使制

勅予有忠毅之士班于殿巖列于扈衛者咸擇部帥之
長以明軍師之法而於郊貺率有遷授以爾等材勇出
衆義烈著稱擢自顏行董齊虎旅或馳聲邊障或累効
天營逮此需恩兼領諸校寵榮斯至益楫欽祇

廣南轉運使孫抗男适可試祕書省校書郎制

勅某以爾父久司計漕遠處炎陬頗著夙夜之勤遽聞彫落之戚命錄嗣子試僚祕丘益勉省脩克紹家世

步軍副都指揮使宣州管內觀察使范恪可馬軍副都指揮使軍節度觀察留後殿前都虞候隴西

防禦使王凱除步軍副都揮使

闕

州觀察使制

勅在易師文之義必藉剛中之德以居總正之位邦懷衆服乃獲亨吉惟我祖宗武定天下扈拱宸極分屬三

帥制馭之法猶在耳目節其衣食故約而不匱均其役
使雖勞而不怨拊率之弊息而奮勇之志決今于貔虎
之士以百萬計擇任將領其可易乎具官恪智略明果
而資之以沉毅凱識慮精通而濟之以忠貞咸更疆圉
之任而風稱甚遠久侍軒陛之近而恭畏無懈信委茲
重迭遷其守以爾恪知兩使之務總萬騎之風以爾凱
一作啓乘車之行專伍符之籍爾其承渥命之厚念賢
將之業祗服辭訓以稱朕意

龍神衛四廂都指揮果州團練使安俊除捧日天
武四廂都指揮使內藏庫使賀州刺史郝質除
州團練使龍神衛四廂都指揮使制

勅國家兵師之權分建三帥而步騎之列咸率其屬以
相軍政以伸國威苟非忠勇之材莫與其選具官安俊
性資沈遠智謀周達出臨障塞入承扈衛具官郝質精
通武略善御士心屢職戎鈐久著風稱會師員之缺次
繇部校而迭遷分握虎篆上拱天極恩榮信倚莫是重

馬

尚書金部員外郎直祕閣范鎮可依前金部員外郎直祕閣充開封府推官制

勅具官某爰初筮仕以儒飭身詞章右於衆人聲稱籍於天下擢之學序而訓導尚於經術延之文館而譔述精於史體外勢利而自守入名教以爲樂惟爾言行蓋有聞矣都會之府市獄之淵必資敏明乃濟繁浩往佐厥治用觀汝能

服闕人卒若渝可依前少府監分司南京制

勅通喪之禮稱於人情惟天道之行日月已究起任生者之事是臣子之節兼得其中也具官某風力清粹器尚冲深久踐仕途屢更任使向分留都之治中嬰素韞之艱禪纖既除朝著斯復悉還舊秩往服茂恩

洛苑使昭州刺史新就差充并代州管內

闕

步軍

鈐轄馮行已可左藏庫使兼知代州皇城使新就
差充定州路駐泊兵馬鈐轄充保州等處都巡檢

劉允可遥郡刺史兼知保州制

九一作几

勅自兵民之判而爲二其治兵民者有心其間不能均
一豈不異哉故守邊郡者兼得治之唯材能智略之敏
乃可以授以爾行已挺生相門卓犖有立久居疆圉特
著風稱以爾允世家守儒復取科等不殊文武自期功
名或增禁府之聯或領州符之重提封之大可以爲政
屯旅之衆可以訓戎夙夜精勤以稱予意

楊注可試祕書省校書郎充春州軍事推官權知

春州制

勅具官某嶺服之遐風氣尤異雖方州號為出守繇鈴
笕許其願行寵以賓幄之資委之郡章之重勉尚廉治
庸稱褒恩

醫人李守文可國子四門助教制

勅某嶺志方伎記迹侯家屬誕慶之辰推及下之澤與
陞庠學脫去民編恩榮甚華勉自精飭

西上閤門使新差高陽關路鈐轄馬懷德可雄州

刺史仍舊西上閣門使兼知雄州引進副使新差
充益州路鈐轄宋守約可西上閣門使制

勅國家撫臨多方專尚文治而邊圉要重之處莫不分
戍守邊防外虞唯其命帥鈐戎之二者必得材而後授
之具官馬懷德性尚沈毅智略通明移控朔陞進領州
蔡具官宋守約忠果著聞恩信及人遣護西兵之雄特
拜右闡之重渥澤皆茂揣稱良難爾其悉力盡公修舉
厥職以副謹擇之意

殿中丞王綱可太常博士制

勅某國家馭吏之法三年而遷用爲故事以爾綱頃從南軍專持文要比還列賞裁減歲遷監軍全彬以爾有勞形于薦引曲臺之命特爲優寵勉楙誠節母怠而志諫官韓絳轉官修起居注制

勅具官某爾以高第爲左右史之官而有端方直亮之節徹於予聞命居諫列甫暮歲序規納獻替動臻理要以疾移告懇祈外補朕念敢言竭力之人詎可以遠既以

考績之法遷與郎署而又還記言之職日侍嚴近蹇蹇之論尚或相予爾其勉之

入內都知武軍節度觀察留後王守忠弟守規制

勅具官守規

闕

念昔儲坊唯守忠祇事左右攀附鱗翼

漸于禁近總都內宰久而益恭嬰疾捐世朕甚悼焉閔舊錄親厥典惟舊爾以材敏叅列軒陛方重天倫之戚擢進使聯之重勉自修率勿懈而志

王守忠男懷玉制

勅守忠長男懷玉等朕在東朝惟守忠祇事左右攀附
鱗翼漸于禁近總都內宰久而益恭嬰疾捐世朕甚悼
焉閱舊錄親厥典惟舊遷丞殿旨擢進使聯寵數之蕃
實厚勤故爾宜修率勿懈而志

王守忠諸婦制

勅守忠男懷誼妻張氏念守忠事予恭勤不怠比聞淪
謝特深愍悼恩寵其家逮夫諸婦脂田肇賜實啓大邑
渥命優厚永惟欽承

禮部員外郎兼侍御史知雜事張擇行等可依前
官充天章閣待制知諫院制

勅帝者之明莫若唐虞尚旌敢諫之士蓋以萬微之務
必得端亮以修不逮肆予臨御注意諍臣而於授受之
間特慎其選具官某資性敦厚行履清勁臺端繩糾卓
然風采具官鯁贄敏識周通素尚方正箴規政治不回
要路竝進雲章之職叅居規地之密勿替而守以稱朕
意

屯田員外郎充殿中侍御史裏行余希孟可殿中
侍御史充言事臺官制

勅具官憲臺之職彈治百官分決詔獄昔我真考特置
言事御史顓持諍議所以甄錄才美嚮爾陪列殿內知
無不為序進官聯益推渥澤噫敢言非難中理惟難勉
楮乃誠服我休命

觀文殿大學士戶部尚書知許州宋庠男椿年可
守將作監主簿制

勅某誕慶之節中外臣辟抃呼稱壽罔不和說朕嘉與
舊德共樂無疆恩于而家用為榮寵命爾京稱漸于官
政力圖德業毋懈夙夜

衝替人前益州司法叅軍胡永錫可霸州錄事叅
軍監淄州鹽稅制

勅具官某郡督郵之任蓋所以紀綱政治糾司過忒惟
強明幹敏者乃為之以汝嘗歷諸曹復更罷免具以都
掾之目蒞于征權之局夙夜思慎毋空厥官

劉元瑜奏醫人孫士龍試國子四門助教制

勅某挾方伎之學遊近侍之門言達予聞命試爾秩脫
迹民版足爲光榮

歸明人等詞

勅某等驚猛之材久雄於種落忠順之志願圖於聲明
特推朝渥之榮以示邊防之寵勉圖報効勿忘欽承

端明集卷十三

欽定四庫全書薈要卷一萬四千五百十四

集部

端明集卷十四

宋 蔡襄 撰

制誥

皇后曾祖妣制

勅朕以純孝事親至誠饗帝躬執牲玉造于郊廟均畀
嘉福敷于四海眷坤儀之重實相祠事追賁曾世厥惟
舊典皇后曾祖妣材武沈雄志尚超邁風稱馳於藩屏
勲業著於戎韜儲積善謀延施來裔嚮以椒闈之譽襲

疏圭壤之封屬此明禋易居全魏刻章告策英鬼其承
皇后曾祖母魯國太夫人制

勅朕裸于太室奠于崇丘非唯薦馨德於神天亦以興
民孝行矧予宮壺助有齊明申用愍章以慰誠篤之至
皇后曾祖母某氏志尚惇淑則

缺

蚤專德慶裕延遠

比緣后德之大前啓國垂

缺

方

缺

略均禧奄魯邦而

賜履靈其未昧歆是

缺

皇后祖曹彬制

勅王者嚴於祀事而齊明之志必有中缺于郊廟均

福天下眷惟后德每懷恭止缺祿缺首及焉皇后祖

彬材略絕世資性本仁佐我祖宗戡定海寓功烈明於

日月慶賞延於帶礪然兵戎之舉專向寬平而陰施之

隆乃生缺懿唯覩天之正儷實本祖以開祥屬牲玉之

熙成缺蒙而賜慶惟王英哲尚或欽承

皇后祖母制

勅朕祠郊丘登侑三聖既伸孝于祖考唯我儷德潔神

助相申賁先烈用慰誠心皇后祖母挺生慶門嬪偶華
族柔明之懿動鑒圖則世有陰施挺生令孫正位椒塗
景象軒緯追榮祖室前祔翟章屬禋燎之上缺封之
大宇有光泉窆尚克歆承

劉叅政曾祖景洪贈太子少保再贈太子太保制
勅饗親于廟饗帝于郊德誠黍香並獲嘉貺實于粥輔
贊相熙事追恤曾廟所以昭施慶之澤具官某曾祖某
稔善在躬儲慶自遠丘園肥遯行義著聞祐啓曾孫與

謀幾政屬竣精祀申用愍章加保護於儲宮極光華於壤樹營菟如在尚或承之

劉叅政曾祖母追封清河郡大夫人

闕

氏再追封

榮國太夫人制

勅德厚者其流遠位崇者其數異朝家典故二府柄臣凡更郊祠重褒家廟上延曾世茲惟舊矣具官某曾祖母某氏靖嘉厥德淑慎其儀嬪偶時髦儲載陰慶貽孫之訓逢辰乃享孚佑哲人協調宰路嚮因巖廟之任前

啓郡田之封建此精禋特申愍典昨休城國光耀幽途
尚爾淑靈時克歆鑒

劉叅政祖煦贈太子少傅再贈太子太傅制

缺

休于太室禋于中壇祖考格臨神天歆顧乃惟臣

鄰莫不追慕先烈不有褒祿曷以慰其孝心具官某祖
某世美敦於儒雅德名被於鄉邦善慶之蓄而載於當
年陰施之厚而貤於後嗣萃厥孫謀之令階夫柄用之
能屬奠玉之精禋申納書之愍典惟榮私廟侈命大門

進春坊輔導之職為祖服光華之寵式將孝告尚或歆承

劉叅政祖母追封安定郡太夫人張氏再追封康國太夫人制

勅朕薦瓚先廟則慈顏升配炳蕭陽位則厚祇合侑故於台輔均祿王妣則孝行於上下而恩覃於幽顯矣具官某祖母某氏嬪儀表世婦則承家助施厚德之祥終啓孝孫之慶六珈之飾前被於愍章千乘之封進荒於

大國推榮私闕永賁幽局

劉叅政父素贈太子少師再贈太子太師制

勅郊以事天配侑祖考唯朕誠心罔有不肅推是感思
及于大臣追揚前人之烈則孝治興矣具官某父某德
尚高舉行美純茂樂於名教訓以清白慶靈之績似續
其昌挺生峻良參論幾務寵推先正師表東朝顯耀家
閥幽通隧路噫一禮之舉褒渥上延朕於丞疑眷意良
厚

劉叅政母追封瑯琊郡太夫人顏氏再追封沛國
太夫人制

勅人子飭躬盡節以位於朝者莫不欲顯榮其親以示
于世故郊澤之行首被台路申於愍典所以盡人子之
志也具官某母某氏鑒訓圖史躬勤組紉蚤儷宗儒回
瀋陰慶誕生哲嗣參輔宰庭嚮登郡賦之隆未極國田
之峻屬備儀於吉土爰徹壤於大邦併疏慶渥之華庸
為德施之厚

孫副樞曾祖鶚贈太子少保再贈太子太保制

勅朕薦黃流之瓚內以宗世室之嚴升紫燎之煙工以

旅泰元之重蔚精誠之升聞沛神靈之來格倚賴鄰臣

協申顯相延愍思於曾廟表厚慶於高缺具官某曾祖

某躬善缺猷代嚴清訓缺材智之美而缺用行義之

譽而隆為素封介爾孫謀參予幄缺欽柴之典用推

飭壤之恩進元良保護之聯缺光華之寵

孫副樞曾祖母追封太山郡太夫人闕氏再追封

太原郡太夫人制

勅登吉土之壇展精禋於上帝御中天之闕敷德施於
多方乃眷輔臣追榮先廟具官某曾祖母嘉柔成德淑
惠有儀作合高閼克供時祀慶源來而自遠根本固而
必蕃惟顯孫之賢叅右府之命助相精享格擁鴻禧首
推錫類之仁進列啓邦之寵篆章告策識其歌

孫副樞祖植贈太子少傅再贈太子太傅制

勅朕託王公之上懼德不逮祇享天明風示海寓惟我

輔弼贊祠郊丘需恩大門用均福貺具官某祖某學術
名家材資命世惠澤施於邑治陰慶萃於孫謀進與斗
樞之庭實相泰元之時甫成熙事首及褒先即闕朝之
孤卿列元良之上傳愍章申告幽隧載華

孫副樞祖母追封汝南郡太夫人周氏再追封河
間郡太夫人制

勅朕入清廟陟圓丘奉三后之侑則念及人之親享百
福之貺則思逮下之惠矧我樞廷之哲有懷王妣之慈

申此愍章以飭幽窆具官某祖母某氏性範雍莊閨儀
嚴勅嬪令人於冠族儲善德於後昆再世寢昌四鄰登
用嚮有納書之祿已躋徹郡之榮逮竣事於大神復徙
封於名壤併䟽異典用慰營菟

孫副樞父丕贈太子少師再贈太子太師制

勅國家之重者無大郊廟之祭備物盡志成適於度非
唯臣工克有顯德以贊陟降抑亦先正之有善訓俾爾
習蹈於禮故舉褒典追揚風劭具官某履道冲粹懷材

浚明世美寢延德施憑厚若稼而必穡若構之有堂嗣
子惟良筦予機柄屬周必祀孚用恤章儲宮師訓之嚴
家廟寵靈之渥推本昭孝斯朕意焉

孫副樞母追封河南郡太夫人周氏再追封江陵
郡太夫人制

勅予既念臣工之先正能訓其子以相予祀稽合禮舊
用東朝公哀之命以祔之又念其配必有令美助成德
慶敷錫恩典用均嘉貺具官某母某氏世族高華天資

淵靜柔儀循於家節慙行服於諸宗有子之賢為國之棟向殄平於嶺服旋登仕於樞庭會陽時之畢儀究幽阡而漏澤疏常安之名壤慰聖善之淑靈朝渥甚隆尚或歆荷

孫副樞母追封清河郡太夫人張氏再追封京兆郡太夫人制

勅尊榮其親所以勸人子之孝敦厚其行所以勵臣下之忠朕祠郊丘推澤台輔追褒禰室顯大慶門具官某

母性照賢明躬循法度繁俎以奉先祭璜珮以謹閭儀
積施慶靈誕生材哲方贊幾微之務適陪盛契之禋恤
及慈闈相攸樂壤更賦上田之數需疏幽隧之榮

程相公曾祖新贈太師制

勅立人之道各親其族故廟焉以祀其先馭臣之儀必
有等威故賢者特異其數朕景至嚮天澤延四外唯是
相臣繇其曾父於禮不亦重乎具官某曾祖某潛德內
充英稱遐驚垂清白之訓奕世其承涵積累之祥哲孫

斯復方一相以處外舉三事以褒先會郊時之上儀進
師垣之峻秩阡塗雖閔尚鑒恩靈

程相公曾祖母制

勅朕吉旦執牲幣以饗帝列侑祖考所以教諸侯之孝
矧惟元老實在陪輔渥施之大宜及曾世具官某曾祖
母某氏賢和循度淑惠有儀蚤儷宗儒勤宣婦順深覃
福施之美佑迪胄孫之良列于公台撫是蕃服向啓大
邦之賦已崇象服之榮會畢明禋再荒全晉漏恩阡樹

靈懿其膺

程相公祖贊明贈中書令制

勅朕有耆哲之老總將相之權以綏近輔方予饗帝而
不得與於籩俎其心豈不在予左右故追褒慶典無間
宰庭抑明注意之重具官某祖某奕世隆禮秉躬尚儒
儲慶淵回啓福縣遠若壙之高其址必大若木之遂其
本必固發於再葉登為上公眷祖服之廸祥極帝師而
舉祿屬中壇之竣事陟右相以推榮亶然松阡之華歆

茲拒卣之告

程相公祖母制

勅朕臨崇丘

闕

薦吉玉帝監芳潔神格熙富嘉應雜還

羣靈歡欣思與宗正共承其慶具官某祖母某氏柔範
表于姻族遠鑒燭於箴圖來嬪哲人協布陰德有孫賢
令列于台儀追嚴王妣之封更陪輿地之數大邦其徹
幽窆惟歆

程相公父制

勅自天子下達至行之美莫先乎孝朕裸七室於廟侑
三后於郊思予舊相之重極爾昊天之感追榮禰世以
慰其心具官某父某材智出人而甚遠德業在躬而至
優陰施積於高閎福祉萃于詰嗣登叅鈞軸列於宰司
禋祀甫成神富均被按輿圖之美號占書社於上游祿
有上公之圭告用文人之策恩榮叢至菟璫尚知

程相公母制

勅有國之慶不及于家孰謂之澤有子之榮不覺其母

孰謂之孝朕薦饗上帝均覃釐貺首念良弼追褒慈妣
所以示等數而推恩禮也某母某氏賢德本於天資儀
度隆於壺範挺生喆子登列上台往臨申伯之藩外處
邵公之相會休成於熙等特申用於祔章再開國田大
隆廟服歆茲愍冊用慰柔靈

張宣徽曾祖厚贈太子少保制

勅國家禮成郊丘澤被寓縣而於臣鄰之先咸有典數
其褒及曾世者非二府近列不與於斯所以重其事也

具官某曾祖某蚤仕華途交辟幕府猷為之美屈於當
世德茫之慶發於來嗣祐孚孫胄登與哲科陟元戎之
壇提四寶之印頃陪裡薦實罄齊明舉家廟之祿章踐
儲宮之保護納書告策榮耀無窮

張宣徽曾祖母制

勅具有邇臣以郊燔之慶用東宮保護之秩褒其曾前
闕乃眷其配宜崇小君之號於其私廟榮名稱焉具官
某曾祖母某氏性由禮檢得劭嬪風鑒于圖史之良躬

夫繁藻之祀慶儲當世利澤後人爰啓令孫實登近輔
適中壇之紀事念曾世以推恩徹名壤之風峻副筭之
秩九原而在其慰爾心

張宣徽父固特贈太子少師制

勅水積者其流無窮德厚者其施必遠有能儲慶顯右
其嗣是必推恩以及其先朕廼以祗見泰元敷澤海寓
唯予近輔舉祿先正以慰孝心具官某父某文業敦美
材資浚明風稱著於朝閭慶利覃於嗣續有象賢之哲

登近賢之途相我上儀成夫必祀顧禰宮之清履升儲
保之榮名天日光華下燭幽窅

張宣徽母制

勅朕薦七室於廟侑三聖於郊祖考降臨孝誠昭格眷
予近輔莫不有蓼莪之詠昊天之感近褒慈妣昭顯令
德具官某母某氏蚤繇榮閥來嬪德人儀度肅於閨闈
教範刑於娣族助儲陰施孚哲慶基頃緣子姓之榮前
徹郡田之號裡柴甫畢恩露載敷特崇象服之華并胙

名邦之履寵榮之渥世嗣其昌

樞密使王德用曾祖方贈尚書令兼中書追封許
國公特贈太師晉國公制

勅大臣家廟通于三世所以異禮等而示天下故闕之
著明再筦機政申祿其先以慰其志具官某曾祖某立
誠介特懷道寬冲爵命嗇於當年慶祉遺於來嗣惟乃
孝孫之令入居右弼之崇追顯曾門爰圖成國允矣帝
師之重炳然祖服之華流裕無彊啓祐爾後

王德用曾祖母畢氏追封韓國太夫人特追封魯國太夫人制

勅山嶽之所以施利澤而不竭者以其涵蓄之深厚理勢然也故盛大之室原其慶祉有自來矣具官某曾祖母某氏有雍洽之慈儀具方柔之靜德內修壺教遠祐孫謀兼將相之榮實邦家之賴眷夫曾妣嘗治大封建冠斗樞之崇彌加象服之費脂田益衍幽祿永承恩數斯隆尚克歆荷

王德用祖玄贈尚書令兼中書令追封曹國公宜
持贈太師齊國公制

勅朕涓吉旦告廣庭以登元老冠于宥密又稽典舊追
榮祖服大其私門所以視持絕於臣鄰也具官某祖某
德載當年慶流來裔有孫之令為邦之光出奠藩服則
當注意之隆入輔帷幄則有伐謀之勝惟其大父之廟
錫乃上公之珪兼令紱以居崇陟師垣而益重徹治四
履覆冒全齊汗塗之幽無昧欽享

王德用祖母路氏追封陳國太夫人宜特追封

闕

國太夫人制

勅君子修身無忝其祖固為孝德之美而況登冠弼輔
追榮上及豈不為存歿之光乎具官某祖母某氏華望
蓋世美行在躬合婉辰髦積埤善慶再世彌大兼相是
崇眷惟王妣之慈向啓國田之賦相攸越重顯命惟承
王德用父超贈開府儀同三司太師尚書令兼中
書令封魯國公宜特追封燕國公餘如故制

勅予有耆德之臣越自外相入冠宥密方將倚辦謀明
協濟幾務是用追榮先廟以重寵數具官某父某材略
沈雄志氣忠厚昔事先帝實董元戎風美悚天下之聞
德施存後世之大惟乃令嗣蚤與樞庭忠勤一心出入
二紀近繇陪輔專在老成宜申祔於禰宮特進荒於大
國上公之哀實琢其章載煥幽阡莫大斯祉

王德用母朱氏追封榮國太夫人宜特追封吳國
太夫人制

勅弼臣之重等數之大固絕於衆登拜伊始追祔其先
所以明朕眷倚之厚具官某母某氏挺生令族來嬪駿
賢蘋蘩以觀法度之成圖史以規德訓之美裕然基慶
紹厥世勲有子之英久相于外比因節召爰冠樞謀申
愍冊於慈闈畫鉅封於樂國全吳之壤斯以詔榮

山南東道節度使同中書門下平章事賈昌朝曾
祖母栗氏可封韓國太夫人制

勅朕薦瓚先廟則慈顏升配炳蕭陽位則厚祇合侑故

於台輔均祿曾妣則孝行於上下而恩覃於幽顯矣具
官某曾祖母某氏嬪儀表位婦則承家助施厚德之祥
終啓孝孫之慶六珈之飭前被於愍章千乘之封再荒
於大國推崇私閥永賁幽局

端明集卷十四

欽定四庫全書薈要卷一萬四千五百十五

集部

端明集卷十五

宋 蔡襄 撰

制誥

新除宰臣梁適祖文度皇任齊州禹城縣令累贈

太師中書令可贈兼尚書令餘如故制

勅易稱積善之家必有餘慶聖人之論豈苟而已朕每
延登宰輔財成教化者必褒顯前人追用愍卹旣榮其
家然後可以倚辦國事具官某祖某德望粹美行實淳

深竦拔之材蟠錯而不掄臍沸之泉淵渟而必決回擁
陰施啓佑令孫詔以謨猷寘于鈞軸逮茲登用之始旌
夫奕世之勤即內史之崇階陟中臺之總錄漏恩幽壤
光顯慶門營魂有知其享予之休命

梁適祖母追封榮國太夫人衛氏可追封闕國太
夫人制

勅人臣所以貴于當世者惟爵命之差故居宰府於其
始也追榮三世之廟示特絕於官師而表輔相之重也

具官某祖母惟爾孝孫嘗貳機政固已啓大國之封而
列小君之號今正鼎席助成萬務稽尋禮舊申叙封壤
疏恩至厚以光華於旣表而發揚於裔嗣靈其鑒茲

梁適父顯皇任翰林學士右諫議大夫累贈太師
中書令可贈兼尚書令餘如故制

勅近以宰輔虛席擢任參貳以政其位朕念被命之際
入陟帝庭則陳道注委之大退款家廟罔不興劬勞之
感非有愍章追冊何以發揚其先烈而慰安其孝心乎

具官某父某以文業之茂中乎選首以才德之劭登于
禁塗蘊澤利之資而屈於當時積陰施之厚而施于後
世厥有嗣續弼予政機甫茲調燮之初眷夫詒燕之遠
稽考典故申命褒榮陞冠文昌顯賁幽窆嗟爾九原之
魄歆予三事之崇

梁適母追封安國太夫人閻氏可追封闕國太夫
人制

勅進登宰路者所以共治天下而於其家必極褒崇者

非特慰夫幽塗亦以伸人子之榮遇也具官某母天性
靖嘉禮度雍穆挺生華閥嬪儷哲夫以淑慎之美而表
於壺儀以惇嚴之訓而勵于子姓肆爾令嗣陟于台司
誦勤劬而發詠蓼莪申恩責而益陪湯賦進徹大國舉
成愍章壤樹之華斯其至矣

宋觀文祖制

勅朕於羣公褒其先廟所以勉子姓之勤大其私門所
以切邦朝之助爰諏吉旦對越上靈竣事均釐莫如舊

弼申褒祖服用慰孝心具官某祖某道充于中材浮於
仕善政之澤遺思在人陰德之流餘慶及後啓孫謀之
方重登宰路之猷為往于藩宣適此禋祀追榮王考舉
錫公圭爰徹樂國之封永賁幽阡之寵

宋觀文父圯制

勅天子祀七世而祭上帝其禮莫與為大公卿乃有家
廟以伸時享朕裸清明之宮奠泰元之坐升侑三后丕
薦孝誠念予大臣罔不懷其先正肆於慶澤均被褒祿

具官某父某性尚冲粹識照高邁材美不曜磐于幕府
德回復貶于子舍厥有令嗣登予上衮均逸陪京之奧
述職大神之祀再荒名國申賁禰宮兼隆特引之儀併
為追遠之數英魂不泯歆是愍章

宋觀文妻制

勅朕禮成帝時澤通海寓念予股肱元老往服藩政既
榮其躬又推而及其室所以表恩章之良厚具官某妻
某氏服儀德閼嬪儷宗工隆為世範而有家節之嚴助

成賢業而有邦光之美向繇台席之命前治國田之封
逮已上儀復申異數按於輿地錫以名疆恩渥之蕃勿
忘祇荷

富觀文母韓氏封華原郡太夫人制

勅朕饗清廟登泰時雖祖考歆侑孝誠上達然念劬勞
之德欲極天下之養莫可得已故於近輔有承顏朝夕
者首敷慶澤非特循典故異恩禮之然抑予心之思推
而下及也具官某母賢惠本於天資儀度隆於閭閻誕

生喆嗣嘗貳樞庭惟是忠誠率繇善訓逮茲裡望之舉
申錫慈闈之封徹祝輿圖畫治名壤於為人母而觀厥
子之有立於為人子而恩其親之及年又茲寵渥之蕃
疇及私門之慶

張端明父制

勅具官某父某朕饗清廟登泰時雖祖考歆侑孝誠上
達然念劬勞之德欲極天下之養莫可得已故於近侍
首敷渥澤其有承顏慈闈者優異恩數非特典故之然

抑予心之思推而下及以爾涵德靖溫不撓俗累長厚
之行率于鄉國清白之教嚴于家庭有子材賢服于禁
近願回裡嘗推奉親慶嘉其志尚重茲美遷官聯陟芸
書之清階品被銀章之美祇荷榮命永懋忠訓

太子太師致仕杜衍可依前太子太師致仕加食
邑七百戶實食封二百戶制

勅朕齊明祇栗躬執牲玉以事宗廟上帝神天鑒格蒙
獲福應四海內外歡欣交通眷惟曩輔實助予德敷厥

恩數以將厚意具官某以清修為身檢以忠蓋為國謀
昔正台衡進退以道歸休里閭誠心不懈泰元修報慶
澤周洎矧惟舊弼望隆天下增埤邑賦之實復累功號
之美併示優寵往服休命

樞密使給事中王堯臣可金紫光祿大夫依前給
事中充樞密使仍賜推忠佐理功臣勲封實食封
如故制

勅朕親執牲玉祇饗郊廟人祇歡欣慶賚周浹惟予弼

輔大臣與圖機政陪侍祠事兢兢齊栗不有恩命曷以
章寵數之厚具官某自登宥密蚤夜悉心以持國論罔
不忠盡而於幾事區處中理材賢之稱著在時議適講
禋燔之禮竝推渥澤之異陞級彌峻爾其懋哉

王觀文制

勅朕以純孝事親至誠饗帝每歷三歲躬造郊廟神界
嘉福四海入安顧于邇臣齊精奉祀不有慶澤曷以將
夫厚意具官某材資端茂行實清峻嘗與機政久參國

論比延經業之美復陪講學之奧適已燔燎均賚澤惠
增衍田賦進承勲衛寵數之異勿忘祇服

給事中充集賢殿學士向傳式可加食邑三百戶

制

傳一作傳

勅朕齊明祗栗躬執牲玉以事郊廟神天鑒格蒙獲福
應澤賚之行周于寓內況予近列奉祀於內述職於外
宜有恩數以彰寵異具官某才資沈厚履尚修飭蚤登
省闈休有風猷畱視宮鑰益彰才稱中壇展報慶自近

始增徹輿賦之奉序升陞品之榮勿忘欽承以載光寵

王尚書制

勅朕臨海寓庶品安乂且三紀矣惟祖考畀予大憲惟上帝祐予嘉應乃仲冬吉旦裸于廟奠于郊所以薦誠而大報又念臣工之有竭忠純以輔予善者不有慶澤曷以章夫厚意具官某惟爾先正克休令聞執憲中臺參論大政歷踐都座為時顯人爾以端方厚重而資之稟於先覺向所履者咸紹前人相儀精禋率繇儀度衍

之并賦楸以勲衛貤于而家以昭世德之美

端明殿學士兼龍圖閣直學士張方平可加上輕
車都尉食實封二百戶制

勅人主上事郊廟下臨士民理適厥中茲謂興治朕越
丁卯享于道祖翌日裸于太室又明日執牲幣以見上
帝已而赦天下大賚內外百執事推舉名典況予近侍
所宜先焉具官張某汝以文業登禁近以端毅主典憲
以通智總漉之計以善惠布藩宣之政逮茲祠事職

奉常額大正左右助相以成熙事念爾賢勞躋升勲號
增埤賦封欽哉服予之休命

端明殿學士給事中程戡可加上護軍食邑五百
戶翰林學士呂公綽可加護軍進封開國公食邑
五百戶制

勅朕齊明祗栗躬執牲玉以祀郊廟神天鑒格蒙獲福
應澤賚之行周于寓內況予近列奉祀於內述職於外
宜有恩數以章寵異具官某才資方重履尚修飭蚤登

禁密休有風猷鎮撫藩屏益彰材稱泰元展報慶自近
始增衍邑田之厚進列勲號之榮厥恩茂焉勿忘祇載

王珪制

勅朕入清明之宮親泰元之祀祖考天地況施無疆厥
有秉文之士左右顯相而熙福之蕃嘉與均被具官某
才資敏茂行實端方興學切於本元懿文美於訓令回
翔禁近光顯名譽逮嚴事於崇丘常先途於法乘奉珍
瓚於七室貢吉玉於中壇祀容雍和志慮齊栗序升階

次疏列社封竝為寵渥之華益表褒甄之異

王贄制

勅具官某文美中於科等言亮登于諫垣將漕朔陞有
幹給之勞糾虔都獄有矜平之稱屬以躬祀泰時奉引
皇途甫終享帝之儀均施敷天之賚併增階次兼衍賦
封寵數優隆勿忘祇飭

殿中侍御史呂景初可上騎都尉制

勅祖考畀予以基統故祿芳于室以達孝恭天地相與

以施生故升煙于丘以報本始粵爾羣辟肅雍在下福
應之格嘉與共之以爾蚤繇風劭擢居臺憲論議有風
亮之節彈治得糾繩之中侍陪禋享額相齊明載升勲
級之榮益表朝恩之茂

皇親大將軍遥郡制

勅昔我祖宗聖神以有天下付畀於予惟是孝誠以克
保乂親執籩簋見于郊廟宗籍羣闕莫不齊明以奉祀
事庶幾敦於善行成於美化況慶賚之行予何啻焉具

官某天資信厚濟以學術肅雍助祭率繇禮度勲階并
賦用勸親賢汝其念之無懈夙夜

步軍副都指揮使范恪可加柱國進開國公食邑
五百戶仍賜忠果雄勇功臣制

勅朕以仲冬吉日祇事丘時陟配三后祀秩百神諸福
之物擁佑來格均施之澤宜自近始具官某智略之明
而濟其忠厚武材之勝而守以惠和精練事經周旋信
遇擢總勾陳之重益修拱衛之嚴自法輅之啓行訖泰

壇之竣事天宮有謐蹕路無譁顧是忠謹用推慶賞勲
名功號率躡等夷益虔乃心以永來譽

皇城使

闕

侍省內侍押班陵州團練使武繼隆可

加食邑三百戶制

勅某朕練時日記泰元躬事壇丘執薦籩簋百靈歆畱
番畀永福念惟官師陪侍兢稟敷與鴻惠以昭慶賚以
爾材備煩使志務恭飭總司禁省親邁軒闥自臨陽時
還御端闈夙夜之勞彌用信倚進疏公社益埤國田良

恩施之行毋忘祇荷

左騏驥

闕

內侍省內侍押班鄧守信可加食邑三

百戶制

勅具官某國家接千歲之統考一陽之元受記於羣靈
鑠熙於遠極眷惟近從當被茂恩以爾天資深淳學識
優邵久于軒墀之列夙司省禁之嚴時飭樂文相承裡
意比信宿於所在警夙夜以居中衍陪邑賦之蕃益表
拜榮之厚勉思祇載毋懈乃心

入內都知張惟吉制

勅具官某識慮靖深才資敏邵久處近密號為修節總
涖禁省動循典憲朕於仲冬祇見郊廟馨誠達於上下
熙福被于動植爰念行次訖于竣事衛翼恭肅禮容備
順夙夜之勤時乃信倚躡升勲級益埤賦封恩數之蕃
勉荷褒澤

禁軍都虞候已上及藩方馬步軍都指揮使并御
前忠佐南郊加恩封贈父母妻制

勅朕廼者祇事泰元均施熙貺被于四表惟茲信倚之
職董齊有衆勤于夙夜乃有恩恤之典以及其先示顯
榮於當世具官某姿器沈毅材略周敏積儲陰施之大
導發福祥之遠惟是子姓實司戎紀逮終陽時之禮特
賁禰宮之祿進秩環衛漏恩阡窳靈爽不昧尚承厚澤
勅廼者祇祀泰元均施熙貺惟茲信倚之職實有齊
之勤惟榮私門用盡子志以爾姿器魁毅氣尚沈雄嗣
續之強服

缺

予列校逮終陽時之禮進陞環衛之華

歆承茂恩永耀幽窆

右竝父制

勅有國之慶不及于家孰謂之澤有子之榮不貴其先
孰謂之孝朕薦饗上帝均覃釐貺首念爪牙之倚追褒
慈妣所以示表恩禮之厚也具官某母氏賢惠本於天
資儀度隆於梱範誕生子舍訓總戎鈐或陪缺成於

熙典特申祔於愍

缺

冊用慰柔靈

勅某母某氏貌虎萬旅實予爪牙向祀中壇垂慶方夏

眷惟信倚之厚宜有褒恤之恩以爾賢惠本於天資儀
度隆於梱範乃繇子舍特啓縣田靈其嘉永佑爾後嗣
右竝母制

勅朕肅恭神祇慶賜方夏百工上下咸受均福豈惟內
德之邵亦有合姓之賢宜於壺中申明褒渥具官某妻
某氏柔儀閒淑德性端和儼威服於衡璜循采繁於祭
祀仇欽君子總則和門會郊澤之推榮俾湯賦之

闕

勅具官某朕肅見神休覃施寓縣下逮和門之職率褒

合姓之賢以爾淑性端莊柔儀閑婉來嬪遵於禮則作
德謹於閨風久敦中助之誠克著宜家之譽陽時方成
於熙事脂田特啓於大封恩慶其永益務恭順

右竝妻制

諸軍班都虞候制

勅報本郊丘敷澤海寓念和門之總衆扈法乘之啓行
天策無譁蹕路載肅或成防於邊圉亦均被於恩榮竝
加綸綍之華益堅忠孝之志

防禦使錢晦母制

勅朕以天正吉日躬執玉幣薦于郊時神畀蕃釐予弗
自有推而被於臣下四鄰之近達于朝著既澤其身又
祿其生廟所以表恩意之厚矧夫忠孝之家詵然嗣續
願還慶賜推奉慈妣其可已耶具官某母某氏惟乃君
舅克有順德實啓王國逮于福偶翊冠樞宥作相于外
肆爾有翟章之華湯邑之大丕顯厥德今泰壇已事嘉
乃子舍之請徹壤千乘申是愍冊禮非常等揭為封樹

之寵靈其承哉

禮部尚書中書門下平章事梁適姊故度支員外郎直史館洪昺妻保定縣君梁氏可安康郡君制勅朕裸清廟奠泰壇非惟薦馨德於神天亦以興民孝行而輔弼羣公有能

闕

予美輟閨門之慶施于近親

朕甚嘉焉具官姊生於華閥而天姿哲淑嬪于君子而

壺儀雍肅惟爾悌弟以台宰之重相厥裡事願回

闕

典

祇授女兄列封華壤正名小君休哉光榮之澤貴寵而

族

樞密副使孫沔妻母制

勅朕自郊還居行澤萬里輔弼之重恩數最隆因而延
請罔違其志具官某妻母氏世族甲冠資性賢明闕儷
令心章著美德時乃子壻登于樞庭齊明侍祠首被慶
渥願上私門之賞推奉外黨之榮徹封邑田褒顯阡隧
天光下燭神爽其歆

新除樞密副使孫沔妻可進封郡夫人制

勅在召南之詩列公侯之配興鳴鳩之均一言其恩逮下也執繁蕤而祭祀言其動有禮也惟是爵位之崇不有賢婦助成其美則無以表于有衆具官某妻某氏生於華閥歸而宜家稟言容之修觀圖史之奧今汚擢在樞宥為予輔臣爾貴以夫當有加等郡田徹封象服異制爾其荷寵數服訓辭勿忘柔嘉以永休於福祿

兩制兒男制

勅具官某男某天以陽為元德施生煦養而百昌蕃廡

人主憲之故有恩賞褒慶之事朕禋于帝時而澤渥淪
漬覃施四表矧爾近侍奉祠述職罔不恭顯俾而子舍
或其支屬登榮仕版著名京寺勉自修進永克祗荷

待制王居白女可封長安縣君制

勅具官某女惟爾父行實清修列予近侍嚮陪泰時之
祀常奉閼宮之嚴推是慶恩屬於息女載疏蕭露之澤
特徹扮田之封渥命甚華賁于私室

司天監五官正制

勅具官某學通精伎職在天部朕因景至有事郊丘瞻
考祥禋特乃相予澤行百工罔間內外進以階次厥恩
茂焉

中書錄事以下制

勅某禋祀貺施光被四外矧麗西省咸有關掌均行邦
澤之厚序升郡宰之次祇服恩渙務勤祇飭

京官等加恩制

勅具官某朕祇見上帝而百工之列或內與齊祠之肅

或外參職貢之幹悉條恩渙均被釐貺
覲爾誠節服是褒寵

蕃官加恩制


勅具官勲等十二所以詔勞舊稽秩序行慶賞示恩信
也以爾大順存心奕世嚮化率其種落護我邊陲比因
榮望之成誕夫蕭澤之遠錫爾勲級永服嘉寵

端明集卷十五

謹案卷十五第十五頁後四行罔違其志刊本違

訛達今改





總校官庶吉士臣張能照
校對官助教臣黃昌祺
謄錄舉人臣周克鵬